



Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 7 Yangia anidakangma : Tir Yimym

tiryimym@aolima

tir yimym

TAPAK 8

**Baba Ramdev-i tatok meshia
Supreme Court nem affidavit agütsü**

**Rafah amaktsü anogo lateta lir:
Benjamin Netanyahu**



VOL. XXI ISSUE NO. 177 (ADOK 177) DIMAPUR RASEMNÜ (WEDNESDAY) RONGCHII (APRIL) 10, 2024 ₹ 5.00

CEO Nagaland-i Y Patton dang telangzüba meshir

Dimapur, April 9, 2024 (TYO): Mongulbarnü Chief Electoral Officer Nagaland Vyas R-i Yanthungo Patton dang nungi telangzüba meshia shidi ka zülüogo.

April 7, 2024 anepdang 7:00 ako meta Facebook nung Naga Hills account nung Lok Sabha, 2024 election atema BJP atema Star Campaigner Yanthungo Patton-i jembiba video ka post asüba dak sendakba nung CEO Nagaland-i iba telangzüba ya meshir.

Iba video nung Y Patton-i People Democratic Alliance (PDA) consensus candidate, Dr. Chumben Murry atema nüboyimba olen lir ta District Election Officer aser Deputy

Commissioner, Wokha-i shiogo ta CEO Nagaland-i Patton dang zülüba shidi nung shia lir.

Iba video nung Y Patton-i Council Chairman, Gaon Bura aser Polling agent tem dang yimdaklirtem indang votes enoktsütsü ajungmesor ama lir aser iba ya yimdaklirtemi vote agütsüba temeten alema lir ta CEO-isa ashi.

Iba ya shita sūra Indian Penal Code, 1860 nung Section 171C aser Section 171D alema lir aser özüng alema mapa ka lir anungji Y Patton-i iba onük atema osang tejangja ashitsüla ta CEO Nagaland-isa shidi ajanga Patton dang telangzüba meshiogo.

PDA-i Tseminyu nung nübo ayimer

Tseminyu, April 9, 2024 (TYO): Nagaland nung MLA 60 longjema lir ta sayua Janata Dal (United)-i Mongulbarnü Tseminyu district nung Peoples' Democratic Alliance (PDA) consensus candidate Dr. Chumben Murry atema nüboyima sentong ka agiogo.

2023 assembly elections nung JD(U) candidate Jwenga Seb-i Tseminyu A/C nung NDPP MLA R Khing madak takok ngua liasü.

"Congress-i olulu prokshibaji tiyazü ta kuli sayutsü atema linük nung nübo agi tangar memenepertem aser talisa Khristantem asoshi inyaktüsü" ta Dr. Chumben Murry-i iba sentong nung jembidang ashi.

"NDPP ya BJP den yaritepba telok anungji PDA candidate nem vote meinoktsütsüla ta Congress-i olulu jembir. Naga nung ajungtsü atema onoki BJP den yariteper" ta pai ashi.

"India ya linük tulu ka lir aser democracy tulutiba lir. India nütsüng yongsük nung Hindu nung 82% lir saka Hindu nung ajakbo talila bilemloka inyakterem asü. Nübo agi tangar memenepertem anema inyakterem ya 1% nungi 2% shi ka dang lir. Anungji asenoki Khristantem asoshi Hindu nung tajungtem den tesentaktep ayutsüla" ta Dr. Chumben-isa ashi.

"BJP marudanga Khristantem timtema aru, BJP yimsüsüba mapang timtemer aser BJP aoba sülen-a timtemtsü. Ni MP kümra Khristantem dak tashiyim mapa inyakba state nung sorkar dang mapa inyaktüsü ashitsü" ta pai ashi.

Nagaland nung tanga tamangba yimsütem benjungmong nung timtem magütsür aser iba tangatetba ya onoki Khristantem ajema aliba state tem dang sayutsü ta paisa shisem.

PDA indang yimtenren mandangji yimjung, terenlok aser rongsenketzüng tejakleni aotsü asoshi lir. Ni takok ngura Naga yimten latettsü onük Parliament nung benoka jembitsü ta Dr. Chumben-isa metetdaktüsü.

Congress yimsüsüba mapang Naga yimten tebilemstü mekokteti yutsü aser APSFA benok. Ajisüaka BJP sorkari mapang lemsar APSFA agiener, ta paisa ashi.

"Centre nung BJP-i aniba NDA sorkar arutsü aser rongsen peria manguba state ka asünung Nagaland-i Centre dak metaloktsü. BJP ya political party tajung lir. Tanü ni nenok teyari meshii arur saka taruba mapangbo ni teyari agütsütsü atema arutsü" ta Dr. Chumben-isa ashi.

"NDPP candidate-i takok angutsü saka pai votes aika agi takok angutsüla kechiyong ibaji ajanga pai Parliament nung Naga nung aser Naga yimten tebilemstü atema o jembitettsü" ta NDPP lenir aser Municipal Affairs and Urban Development Advisor Zhaleo Rio-i ashi.

Chief Minister Neiphiu Rio-i aniba PDA ajanga Rengma nungeri district aginüba agütsüogo anungji terenlok aser tejakleni aotsü atema ruling candidate yaritsüla ta Zhaleo-i ashi.

Paisa Dr. Chumben dang district tasen renloka aotsü atema Rengma nung yaritsü meshi.

NDPP-i BJP den sendaktepba atema Congress-i aitsür. PDA-i Uniform Civil Code, Forest Act mesüra Assam Healing Act aser Free Movement Regime agienba magizüker. PDA-i maneni Naga nung kümzüka ayutsü ta Zhaleo-isa ashi.

"MLA 60 den tamakok anguba candidate tem longjemer Dr. Murry yarir kechiyong Parliament nung Naga nung atema noktaksü candidate shitakji pa lir" ta NDPP MLA aser CAWD Advisor Kudecho Khamo-ia ashi.

Tseminyu nung constituency ka dang lir anungji terenlok aser tejakleni aotsü atema ruling party yaritsüla ta JD(U) MLA Jwenga Seb-ia ashi.

Parliament nung Naga nung atema noktaksüba leniriji Dr. Murry lir. Pa Parliament-i yokba atema asenok mesasatsü ta taoba candidate RPI (A) Loguseng Tep-ia ashi.

Dimapur Area Aor Ordained Minister Fellowship-i yimjung atema sarasadem



Dimapur nung Aor Reverend-temi Deputy Commissioner Office kima Nagaland nung aruya aliba Lok Sabha election nung yimjung nung nübertem ochishia shilem agitsü atema Tsüngrem dang taochi meshia sarasadem sentong ka agidang agiba noksa ka yangi angur.

Dimapur, Rongchii 9, 2024 (TYO): Dimapur Area Aor Ordained Minister Fellowship tanü India lima 18th Lok Sabha Election nung tiptema agitettsü atema Rongchii 9, 2014 anepdang 6.ako nungi 10 ako tashi DABA tenla kidang adenshia sarasadem kanga temoatsü agia liasü.

Iba sülen Commissioner of Police Office Complex nung 11 ako sarasadem mapang tajung ka agia liasü. Commissioner of Police den parnok aika dena iba sarasadem nung adenba ngua Police department nung alirtem ajak atema teloki sarasadema liasü.

Iba sülen Rev. Dr. L. Kari Longchar, Convener DAAOMF ajanga tanü India nung Khristantem koda masüba lenla

ka nung aliba indang, aser tang Lok Sabha Election nung nisung ajaki pei temeden meyongnem kanga junga bilemdanger agütsütsü ayongzüka liasü. Idakji sentong ajak takok ngua agitettsüsa menden nungdak ajak par Office ajanga renema aliba agi ajak tiptema mener agia liasü.

Iba sentong nung lenir Rev. Dr. A. Wati Jamir, aser temoatsü meshia Rev. I. Lanu Jamiri sarasadema liasü.

Tanabuba nung Deputy Commissioner, Dimapur Office Complex nunga 12 ako nung sarasadem sentong ka agi.

Deputy Commissioner ajanga DAAOMF dang maneni pa den district administration staff ajak atema maneni sarasademtsü

ashiba den tan 18th Lok Sabha Election atema nisung meyirijang dak tali Election duty aotsü alinung, shinga kecha lending makai iba Election tiptema agitettsü nenoki onok asoshi maneni sarasademjang ta ashi. Sentong leniri Deputy Commissioner aser pa den district administration nisung ajak atema sarasadem mapang tajung ka ayongzüka agi.

Iba sülen Rev. Dr. Lima Jamir ajanga Indian Temzüng koma koda wazüka ayuba ajanga alima dang India nungera ta sayutettsü ta tayongzüka o kanga junga jembia.

Iba sentong nung lenir Rev. Lanuyanger aser temoatsü meshia Rev. Y. Bendang Imchen ajanga sarasadem. Tatem nung sentong leniri tarur ajak olen kar shir ajaki Tsüngrem dang aputaka asen lima asoshi sarasademtsü ayongzüka kanga temoatsü ngua sarasadem.

Sentong ajak temer DABA tenla kima Rev. C. Walu Walling DAAOMF Tezüluri tarur ajak aser tanü shilem agirtem dang pelaba o ashiba den Lok Sabha Election matem tashi asenoki kecha lending makai tiptema iba Election temdakjanga ta sarasademtsü mamali ta shir ajaki sarasademersenshi.

Congress-i telongjem aginür, BJP-i telemsa yunür: Jairam Ramesh

Dimapur, April 9, 2024 (TYO): Congress-i telongjem atema inyaker saka BJP-ibo telemsa adokdaktünür ta AICC General secretary Jairam Ramesh-i ashi.

Nagaland nung Lok Sabha elections nüboyimtsütsü atema Mongulbarnü Jairam Ramesh Nagaland-i aruogo.

"2024 elections ya linük nung nübertem atema kanga dang tongtioang election ka asütsü kechiyong iba election ya telongjem aser telemsa tsüngda rara asütsü" ta Congress Bhavan nung osangbener den jembidang Ramesh-i ashi.

Congress-i nübertem temeyoktep nung ajemdaker

telongjem akangshinür saka BJP aser parnok den yaritepertemi tema tazütsü dang longjema linür, ta pai ashi.

"Nagaland kübok tesem ajunga renloksüla aser Naga nungeri aginüba yimtenren taginübatem tongtsütsüla. State shia nung tesem kar züngdoker ama bilemer aser ibaji sorkar ketdangsüba majungba ajanga lir. Asenoki state tem tsüngda regional development aser state sasep nung regional development liromedema ayutsüla" ta Jairam Ramesh-isa ashi.

Nagaland nung political party ajak sorkar nung denogo. Iba ya democracy masü aser asen linük

tejakleni maotsü. Nagaland aser linük nung democracy taküm lidaktsüba party ji Indian National Congress dang lira ser onoki BJP den kodanga haihaura masütsü. Taruba election ya democracy tarutsü atema lir, ta pai ashi.

Congress-i nisung ajak asoshi terenlok aser temeten kasa agütsütsü. Onoki teti atema yimjung, lokti nung teputep adoktsü, azükarutsü aser tejakleni aotsü atema inyaktüsü, ta paisa shisem.

"Congress aser onok den yaritepa INDIA bloc nung party temi menden teimba nung takok angutsü aser ibaji Nagaland nungi tenzüktüsü" ta AICC General secretary Jairam Ramesh-isa ashi.

AMBIENT AIR QUALITY FOR KOHIMA AND DIMAPUR CITY							
KOHIMA ASER DIMAPUR NUNG MOPUNG MERÜK-MEMERÜKBA JENJANG							
Sl. no	City	Location of air station	Type of area	Monitoring dates			Permissible limit As per the National Ambient Air Quality Standards "Iba tasazük alemabo metudaktsütsüla"
				02.04.2024	04.04.2024	06.04.2024	
1	Dimapur	Bank Colony	Residential	147	149	147	100 µg/m ³
2		Dhobinala	Commercial	233	226	218	
3		NPCB Office, Signal Colony	Residential	89	74	80	
4		Tenyiphe, Chumoukedima	Commercial	75	59	87	
5		Nagarjan	Residential	126	83	147	
6		Viola colony	Residential	68	85	77	
7		Burma camp	Commercial	181	173	195	
8	Kohima	Opposite NST Office	Residential	113	110	99	
9		PWD Junction	Commercial	117	108	111	
10		High School Junction	Commercial	122	191	178	
11		Midland (Upper)	Residential	78	84	91	

Iba osang ya nübertem ajangzüktüsü atema Nagaland Pollution Control Board-i agütsür.

Dimapur nung polling personnel atema EVM/VVPAT facilitation centres amenokogo



Dimapur nung polling personnel atema EVM/VVPAT facilitation centres amenokba mapang tangokba noksa angur.

Dimapur, Rongchii/April 09 (TYO): Aruya aliba Lok Sabha atema General Elections 2024 asoshi terenemshiba ka ama Dimapur nung aliba polling personnel tem dang Deputy Commissioner, Dimapur indang office telungzük nung aliba DB Court nung EVM/VVPAT Facilitation Centre amenokogo ta metetdaksü. Iba centre ya April 9 nungi April 17, 2024 tashi lapoka alitsü. Election agitsüba anogo nung inyaksü mapa, forms aser danga maparen mangatetjemi aliba angatetteptsü asoshi

polling ketdangsürtem-i iba centre ya semdangtsü ajungshir, ta sangdong ka ajanga ashi. DLMTs/ALMTs temi hands-on training agütsütsü aser parnok ya melentepa alitsü. Centre nung training sessions telemsa yamai alitsü: 9th April 2024: Dr. Yelhi Vero & Nunsangtola Walling 10th April 2024: T. Zanthungo Ngullie & Lhipe Naro 12th April 2024: Zasekhoyi & I. Asangla Aier 15th April 2024: Dr.

Imkongnungsang & Lima Wapang Ao 16th April 2024: Mordecrai Chase, Mongyung Phom & Ngutoli Y. Chase Swu 17th April 2024: T. Zangthungo Ngullie & Lhipe Naro EVMs aser VVPAT machine tem amshiyim tajungtiba nung angatettsü asoshi polling ketdangsürtemi iba maongka agia training nung shilem agitsü ayongzük, ta Deputy Commissioner & District Election Officer Dimapur, Dr. Tinojongshi Chang, NCS ajanga sangdong nung ashi.

Phek nung polling personnel atema 2nd phase training ayonger

Dimapur, Rongchii/April 09 (TYO): Polling Personnel telemsa ajak atema phase tanabuba training ya April 10 & 11, 2024 anogotem Govt. Higher Secondary School, Phek Town nung agitsü, ta Addl. Deputy Commissioner & ARO Phek, Ruopfukuotuo Noudi, NCS ajanga sangdong ka nung metetdaksü. Presiding Officers aser 1st Polling Officers (Sl. No: 01-130) indang mezüng batch training ya April 10, 2024

anepdang 9:30 ako nungi anüngdang 12:30 ako tashi alitsü aser 2nd Polling aser 3rd Polling Officers training ya nikongdang 1:30 ako nungi 3:30 ako tashi alitsü. April 11, 2024 nü 2nd batch training nung Presiding Officers aser 1st Polling Officers (Sl. No: 131 nungi tema) training ya anepdang 9:30 nungi anüngdang 12:30 ako tashi alitsü aser 2nd Polling aser 3rd Polling Officers training ya nikongdang 1:30 ako nungi 3:30 ako tashi alitsü.

Maneni polling duty asoshi shima aliba ketdangsür ajak iba training nung adentsü metetdaksü aser nisung kar danga training nung madenba metetra Election Law indang tapet section agi merenshitsu, ta sangdong ajanga ashi. Iba sangdong dak sendakba nung mangatetba kar lira, nüngdakba mera agitsü atema April 9, 2024 tashinung Addl. Deputy Commissioner & ARO Phek nem osang agütsütsüla, ta sangdong ajangasa ashi.

Phek district nung requisitioned süa aliba gari atema metetdaksü

Dimapur, Rongchii/April 09 (TYO): Aruya aliba Lok Sabha atema General Elections asoshi Phek district kübok requisitioned süa aliba gari ajunga April 15, 2024 anepdang 9:30 ako nungi

5:00 ako tsüngta Local Ground, Phek Town tonga arutsü metetdaksür, ta SDO (C) & Nodal officer for Transportation Phek, Tsenthungo E. Ngullie, NCS ajanga sangdong ka nung

ashi. Iba totuyuba sülen manidaker nem Representation of People Act 1951 kübok temerenshi alitsü, ta sangdong ajangasa ashi.

Dimapur nung webcasting training agi



Dimapur, Rongchii/April 09 (TYO): Dimapur nung webcasting training mezüngbuba April 9, 2024 nü agia polling stations 15 nung

shilem 20 reprangshima liasü aser mock drill ya April 12, 2024 nü agitsü aser iba mapang polling stations shilem 50 shilem agitsü.

Iba maparen ya master trainers Imnajungshi aser Imnatoshi aser Nodal Officer (webcasting) Kamal Chetri nungeri ketdangsüa inyaka liasü.

Kohima nung prangbong & injang mayoktsü metetdaksür

Dimapur, Rongchii/April 09 (TYO): Kohima district kübok Air Rifles densema prangbong aser injang ayoker ajak dang prangbong aser injang ayokba anentsü aser April 9, 2024 nü nungi shibangtsü Deputy Commissioner Kohima, Kumar Ramnikant-i metetdaksü.

Iba totuyuba ya 18th Lok Sabha atema General Election 2024 mechi agütsür. Mapang nung Superintendent of Police, Kohima ajanga Arms and Ammunition stock ledgers tem tsüngtong oa reprangtsü, ta sangdong ajangasa ashi.

Mon nung AROs aser SOs senden amen



Dimapur, Rongchii/April 09 (TYO): 18 buba Lok Sabha atema General Elections 2024 agitsü aliba mechi Deputy Commissioner aser District Election Officer, Mon, Ajit Kumar Verma, IAS ajanga AROs aser Sector Officers tem den shisadokden senden ka April 9, 2024 nü DC Mon indang Conference Hall nung mena liasü. Pai ketdangsürtem pela agizükba den külemi election

tajungtiba nung agitettsü asoshi pei nem nungloktsüba maparen tajungtiba nung inyaksü ayongzük. SDO (C) Mon, Rongsenmenla ajanga Section Officers indang teinyaktsütem PowerPoint presentation nung agüja liasü. Laisa Officers tem dang aruya aliba election tajungtiba nung agitettsü asoshi pei nem nungloktsüba maparen shidak inyaksü ajungshia liasü.

Dimapur nung Absentee Voters Service Centers lapokogo



Dimapur, Rongchii/April 09 (TYO): Deputy Commissioner, Dimapur indang office telungzük nung aliba DB Court nung April 9, 2024 nü Absentee Voter Ballot Delivery (AVBD) ajanga Absentee Voter Service Centers (AVSC) tenzükogo. Dimapur I, II aser III assembly constituency tem nungi team toku kumteter AVBD teyari nung AVSC ajanga absentee voters bushia ki sema ao. Political party balala nungi teshimtet nisungtem, police

ketdangsür, polling ketdangsür aser Magistrates tem lia ballot boxes tem shibanga ayu. Postal Ballot atema EAC & Nodal Officer, Litsenthung Kikon-i ketdangsüa iba maparen inyaka liasü aser protocol ajak shidak inyak. Dimapur nung absentee voters 179 lir aser AVCS & AVPD ajanga postal ballot agütsüba maparen ya April 10, 2024 tashi inyaksü. Dimapur nung arishi küm 85 nungi tema teintet rogo temi iba postal ballot facility ya amshir.

Phek district nung EVMS/VVPATs commission süogo

Dimapur, Rongchii/April 09 (TYO): 1-Nagaland Parliamentary Constituency atema 18th Lok Sabha Elections asoshi candidate tem asoshi EVMS/VVPATs commission asüba maparen Phek district kübok April 8, 2024 nü Deputy Commissioner & DEO Office, Phek Headquarter nung agiogo. EVMs/VVPATs atema

Strong room tem anepdang 10:00 ako nung lapok. EVMs/VVPATs commission asüba nung master trainers ya Ronald Difoie, Shothilu Dozo, Temjenmeren, Nivi Achumi, Shekhi Chizo, Chivosheyi, Shikato, Zavekhoyi P Vadeo, Thsutho Kajiri, Diwatho Katiry aser Erilo Mero nungertem liasü.



April 09, 2024 nü Mumbai nung Maha Vikas Aghadi (MVA) teloktepi ayongzükba osangbenertem senden ka nung Shiv Sena (UBT) tongti Uddhav Thackeray, Congress lenirtem- Nana Patole, Prithviraj Chavan aser Balasaheb Thorat nunger den NCP tongti, Sharad Pawar nungeri osangbenertem den jembidang tangokba noksa nung angur.

EC-i Union Minister Chandrasekhar indang affidavit reprangshitsü tuyu

New Delhi, April 09 (Agencies): Mongolbarnü Election Commission of India (ECI)-i Central Board of Direct Taxes (CBDT) dang Union Minister, Rajeev Chandrasekhar-i agütsüba affidavit nung osang shidak agüja ali asü maliar reprangshiang, ta tuyuogo. Kerala kübok Thiruvananthapuram Lok Sabha menden nung pa BJP candidate shima lir. Indian National Congress (INC)-i Election Commission

dang, Rajeev Chandrasekhar-i agütsüba affidavit nung pai shia aliba rongsen aser pa ket nung atangji aliba rongsen naji meputep, ta metetdaksüba sülen EC-i affidavit reprangshitsü tuyu. Temzüng kübok candidate kati affidavit nung osang tai sangdonga lira RP Act 1951 nung Arrla 125 A kübok aibelener anema inyaksü. Chandrasekhar-i 2021-22 kümsük nung saru agütsüsüsa anguba income ji sen 680 ta

sangdonga lir aser 2022-23 kümsük nung saru agütsüsüsa anguba income ji sen 5,59,200 lir ta sangdonga lir. Paisa Koramangala, Bengaluru nung pa meyong ali lir aser Indian Scout motorcycle ka lir ta sangdonga lir. Taruba election nung BJP lenir, Chandrasekhar-i Thiruvananthapuram menden nung Congress MP, Shashi Tharoor aser CPI candidate, Pannyan Raveendran na den tokteptsü.

Taküm India nung tzünglu junga arutsü: Skymet

New Delhi, April 09 (Agencies): Taküm India nung tzüngluruwa mongpu nung tzünglu shidak arutsü, ta tsüingsang-mopung asadanga nija agency Skymet-i metetdaksü. Tzünglu aruba mongpu, June nungi September ita tashi kanga tatsük asütsü, ta tamalen asadangteta sangdonga liasü, ajisiüaka taküm tzünglu shidak arutsü ta asadangteta ajanga aika melung süngzüksü. Tzüngluruwa mongpu

mesüoka maliba alu nung tsük, mendi, mochi, kümpa aser azüngen ama aonsotsü balala atema June-September tzünglu dak dang metaloker. "El Nino kanga keraa La Nina kümdar. La Nina kümtem nung tzüngluruwa mongpu circulation ji tashitaitbasa asür," ta Skymet nung managing director, Jatin Singh-i metetdaksü. Taküm India tesem ajaklen tzünglu kanga junga arutsü imlar, ta Skymet-isa metetdaksü.

mesüoka maliba alu nung tsük, mendi, mochi, kümpa aser azüngen ama aonsotsü balala atema June-September tzünglu dak dang metaloker. "El Nino kanga keraa La Nina kümdar. La Nina kümtem nung tzüngluruwa mongpu circulation ji tashitaitbasa asür," ta Skymet nung managing director, Jatin Singh-i metetdaksü. Taküm India tesem ajaklen tzünglu kanga junga arutsü imlar, ta Skymet-isa metetdaksü.

Centre-i CEC Rajiv Kumar nem Z-category VIP security agütsür

New Delhi, Rongjuui/April 09 (Agencies): Chief election commissioner (CEC), Rajiv Kumar taküm amokmeren jenjang nung lir ta meteta Mongolbarnü Centre sorkari pa nem Z-category VIP security cover agütsüogo. Union ministry of home affairs-i Central Reserve Police Force (CRPF) dang CEC Kumar taküm kümzüka alitsü

atema pa atema commando 40-45 shi lemezükjang, ta tuyuogo. CEC taküm amokmeren jenjang nung lir ta Central security agency temi metetdakja pa nem security tajung agütsüsüla, ta benoka liasü. April 19 nungi tenzüka Lok Sabha election shilem tenet lemsar agütsü lia chief election commissioner nem Z-Category VIP security agütsür.

CEC Kumar-i linük tesem balala sema senzüdang Commando tem jagi pa meina jajatsü aser official sentong ajak nung pa nem security agütsüsü. Rajiv Kumar ya retired Indian Administrative Service (IAS) officer ka lir. 2022 küm May 15 nü pa India nung CEC 25buba aküm. 2020 küm September 1 nü pa election commissioner shima liasü.



April 09, 2024 nü Pilibhit nung Lok Sabha election atema nüboyim sentong ka nung Ato kilonser Narendra Modi aser Uttar Pradesh Chief Minister, Yogi Adityanath na den tangartem tangokba noksa nung angur.

Baba Ramdev-i tatok meshia Supreme Court nem affidavit agütsü

New Delhi, Rongchii/April 09 (Agencies): Patanjali Ayurved tenzüker ana- Baba Ramdev aser Acharya Balkrishna nati advertisements taila agütsüba atema telatetba kecha makai tatok meshia Supreme Court nung affidavit agütsüogo. Taila advertisements agütsüba ken o angadangsü anogo ka lia Baba Ramdev aser Acharya Balkrishna nati affidavit agütsü aser iba metokteperi atema tenati chichia tatok meshir, joko tenati kasa aibelen masütsü ta shiogo. April 02, 2024 nü Justices-Hima Kohli aser Ahsanuddin Amanullah nati akümba bench-i, tenati affidavit ajanga tatok meshiba nungji telatetba kecha makai tatok meshir ta shia mali, anungji tenati sasabaji tabensa masü, ta metetdakja liasü. Supreme Court-isa tena dang, nena kübok inyaker ketdangsertem nem tai tonglokja nena sasa kümzüksü makok, ta metetdakja liasü. April 2 nü Supreme Court bench jagi, "Iba ya linük nung

tematiba court mezüngmeshiba lir, anungji iba ya pungpa-pungpaa agütsü makok. Nenoki tatok meshiba jagi court melung masür. Iba ya o kija agi tatok meshiba lir," ta metetdakja liasü. Patanjali company-i ozüng alema inyakyonga Centre aser Uttarakhand sorkari itemji mangu ama dang yutsü, ta shia court-i sorkar-a aija liasü. Court-isa, Patanjali-i coronavirus tashidak densema taneptsü makokba tashidak balala aneptsüteter ta shia taila advertisements agütsüba jagi ozüng alema lir, ta metetdakja liasü. Yaküm November ita nunga Court-i iba company dang 'teti atema taneptsü angütsü' ta shia kecha advertise masütsü tuyuba den külemi item ama tenangzükba agüja advertise süra senchi achitsü, ta tekümdangsü metetdaksü, saka company-i maneni 'tenük, blood pressure, temang ayang-ashi, asthma aser diabetes teti atema taneptsü angütsü asoshi Patanjali mozütem lir', ta sangdonga liasü.



Delhi excise policy ochimashi dak sendakba ken o nung April 09, 2024 nü BRS lenir, K Kavitha Rouse Avenue court-i anir aodang tangokba noksa nung angur.

Delhi CM Kejriwal-i mepishiba ken o High Court-i magizük

New Delhi, April 09 (Agencies): Delhi Chief Minister aser Aam Aadmi Party (AAP) tongti lenir, Arvind Keriwal-i excise policy ken o nung Enforcement Directorate (ED)-i pa apuba anema High Court nem temepishiba ken o ka agüja liasü, ajisiüaka High Court-i iba temepishibaji magizük, anungji pai maneni High Court anema Supreme Court nung temepishiba ken o agütsüsü, ta Mongolbarnü AAP osang ka ajanga metetdaksü. Mongolbarnü Delhi High Court-i, ED-i lemsatepba kakettem ajanga Arvind Kejriwal-i tangartem den senteper asalentong yanglu ta asütsüsa kulitem lir aser ozüng alema inyakba senotsü amshiba nung shilem agi, ta shia temepishiba ken oji magizük. Mongolbar nikongdang Delhi High Court-i obendang agütsüba sülen AAP lenir, Saurabh Bharadwaj-i, "Party aser Chief Minister Kejriwal jenjang raksatsüsü atema yimtenren nung asalentong tulutibaji excise policy ken o ya

lir," ta ashi. Paisa, "Onoki Delhi HC akhümtsübur saka parnok obendangi magizüker. Onoki maneni Supreme Court nem temepishiba ken o agütsüsü," ta metetdaksü. Delhi High Court-i, Kejriwal apubaji legal inyakyim anema masü, ta metetdakja liasü. High Court-isa, senotsü ochimashi ken o nung CM apu, anungji pa apubaji court-i shisadangsüsa akümer aser election mapang nung süaka ozüng kübok pa soita ayutsüsa akümer, ta ashi. "ED ket nung kuli aika lir, aser iba nungji ajemdaker senotsü tsütsü ochimashi ken o nung Arvind Kejriwal apu," ta Delhi High Court-i metetdaksü. March 21 nü ED ketdangsertemi Delhi Chief Minister Arvind Kejriwal'er ki tsüngdong oa pa dang ghonda ana shi asüngdangyaba sülen pa apu. April 1 nü pa anogo 15 atema judicial ket nung agütsüba sülen tang pa Tihar jail nung puoka lir.



TIR YIMYIM

YIMOBILEM (EDITORIAL)

DIMAPUR RASEMNÜ, APRIL (RONGCHII) 10, 2024

Naga yimten ken o süshi tenzükogo

Ano India telongjem kübok Nagaland nung dena agitsüba election ka arur asünungji, ato kilonser Narendra Modii anir Naga nungger yimsüsürtemi Naga yimten tebilemtsü ken o süshi tenzükogo. Ibaji kodang bilemdangdir, Naga yimten nüchiso ken o ya shitakba Naga nungger asoshi yimten nüchiso angutsüba ken o masü saka Naga nungger mesüzüka election nung yaridaksütsü asoshi election mapang jembiba ken o ang ka kumogo ta angateter. Aji oda, Naga nungger ajak rong ana nung tetsüng külenlen ajemoka yur jajar asünungji, külen Naga yimten nüchiso atema jembir saka ano külen India nungger election nunga senso tajung ka ama shilem agir ta peisasa aolena mejangja küm aika arudagi. Talisa, küm 50 jakdang, 1970s nung UDF telok aliba mapang Naga yimten tebilemtsü ken o ya tatembang küma latettsü asoshi election mapang kanga sashia jembitsü tenzükba nungi tanü tashi election shia Naga yimten ken o tatembang küma jembitettsü asoshi yimten telok shiai nübortem dang vote agütsütsü mepishia lokti senden nung jembiba asenoki angashir. Ajisüaka, election temerbo sen bushilen senzüdang yimten nüchiso bushitsü mapang mangur. Iba jagi election mapangang Naga yimten tebilemtsü ken o khen jembirbo tama akümer. Kasaji, Naga yimten tebilemtsü kokteta telemtetba agitsü atema Naga nungger yimten nüchiso bushir teloktem den tezüngzüktep ken o lateta yur joko küm metsü-semer jungdi asür saka telemtetba ka arur masü, Naga nungger rongnung telokang aika küma lemsaogo aser India tatar hoho nungbo Naga yimten ken o süoka jembir mali kumogo. Atangji, Naga nungger dak yimten tangatetba takang ka maliba agi center nung lenirtemia Naga yimten ken o ya süoki ia mebiler asütsüa akok. Ajisüaka, Naga yimten onük ya election magiba mapang senotsü bendentsüba onük ka dang küma jembia senzütsü aser tang ama election agiba mapang vote angutsü atema dang jembia senzütsü ta dang süra India nungger tsüngdang Naga nungger telong aser tema nung alirtem ajak nübanglang mesüra süngolang dang kumadoker. Yimten mapa nungbo tangatetba alitsüla aser yimten ken o a tangatetba agi jembitsüla, ibaji dang mesamai taküm alitsü . Ajisüaka, yimten nüchiso atemer senotsü sarua jajaba aser election nung takok angutsü atema yimten nüchiso indang jembia senzübajibo election tatem den külemi amadoktsü. Nagaland state kümer India temzüng kübok election agi shia yimten telok ajaki Naga yimten tebilemtsü tatembang küma telemtetba agitsü asoshi nangzüka aru. Aji oda, talisa Regional teloktemibo election temli Naga yimten telemtetba agitettsü amato nübortem nem teimla tulu agüja jembia jaja. Iba kasa teimlaji 2003 küm NPF telokia agütsü aser tang NDPP telokia agütsüdagi. Kasa teimlaji, Nagaland nung NNO telok aliba mapang nungi tang Congress aser BJP teloktemia Naga nungger yimten tebilemtsü ken o ya koka jembitsütsü rakteper amato jembiba asenoki angashir. Atangji, Nagaland nungbo Naga yimten tebilemtsü onük ya tebilemtsütem rongnung tulutiba,, anungji telok ajaki iba tebilemtsü koktettsü asoshi süokia ia jembibaji junger. Ajisüaka, iba onük ya election mapang anogo anasemka jembia jajaba ya masü saka election malidanga Naga nungger yimsüsürtemi anir center nung ato kilonser aser kilo kilonsertem den ken o koka jembitettsüla. Naga yimten ken o ya shitakba kin ka yimten ken o masü saka Election nung Naga nungger mesüshiba ken o ang ka aküm nungji, joko Delhi nunga Naga yimten ken o mejembir aser Nagaland nungbo Naga nungger ato kilonser metsü junga alitsüsa telok tajung metsü dak tali renloka odagi. Shitakba yimten tashi amshia Naga yimten tebilemtsü ya koka jembidi süra Naga nungger telok balala paikaya küma lemsaba ya asenoki anendaksütsü tim aser Naga yimten onük ya Election nung amshiba onük dangbo masütsüla.

OLEMSABANG

Laishiba nung yi majemtsü atema tekümdangtsü ashiba kar

~ L. Kika Pongener.

Tawa tanü Naga nungger tashitemeteter kar den osang-bener kari asüngdangya asü dang...Laishiba nung yi tejem ta zülua malia ta indang-indanga jembiba Social media kar nung angu. Ajioda, iba ama pei tangatetba-jiang shitak ta ammeter jembiba jagi tongmelanger karbo mashilen angateter aibelena aotsü. Laishiba nung zünga, laishiba tapu aser tekong aika nung yi majemtsü, yi ajemba ajanga takoksa, yi-jemer sensak tiai ayitsü aser yi jemra timtem lir...ta zülua angutsü. Anungji ni iba ocet nung item laishiba tapu aser tekongtemji kar lemsatepnur.

Efesa-5:18. "Aser yi koba nung teraratsü lir, aji agi temesepma, saka Tanela agi sunga liang". Iba laishiba tapu aser tekong nung ya indang-indanga yi agi memeseptsüba indang shia angur. Yi koba nung teraratsü (Alcohol) lir, iba yi jagi memeseptsüba...Tetezü majemtsü mesura tejem ta ashirba ta angatetdi. Anungji iba laishiba tapu aser tekong nung ya indang-indanga yi agi temesep ta ashibaji tejem ta ashiba lir, saka Tanela agi sunga liang ta ashir...Tetezü iba temesepba chiyungtsü nungi pila-a taküm asüngteta merukteta liang ta shinur.

A.Shin-20:1. "Yi sensamasadaksüba aser temesepba yi rongrongdaksüba lir. Aser iba nung shibai aibelendir shisatsü maka". Kodang nisung ka yi agi mesepa jemdir, pai pei sasa pei temang menener, kilentsü (Nalla) aser lenru ajak nung mashipangi mejanger, maya-koya o maaksu o numadanga jembir, nisung dang aakba shisatsü samaa-adoker. Anungji yi-jemer taküm kaji nuburtemi kanga sensa-masa-a mezüngmeshir. Ano kodang nisung ka yi agi mesepdir, memeteti yak-yakta ain adoker aser iba ain adokbaji mazüokteti tangar den rara menar aser züktepa rarateper. Ano yi-jemer aser yi agi mesepba nisung ka jagi kiyong nung, loktiliba nung aser yimdak-yimtsüng nung rarabangsen aser rongrongshishi adokdaksür.

A. Shin-21:17. "Shibai amajok pela meimdir, iba nisungji sensaker asütsü. Yi aser totzü meimerji takar makümtsü". Kodang nisung ka yi agi mesepdir, pa kanga sasa-pelaa küma-adoker, saka iba tepelaji chichiba tepela masü, mapang tatsüka atema, khen atema tiyazü pelaba dang asütsü. Anungji iba tepela dangji amajok tepela ta ajar. Yimya agi yi ajemer nisung jagi senotsü mapayui lalushiponga endoker. Anungji yi-jemer taküm kaji takar makümtsü, teti sensaka dang alitsü, kaa-ita alirtema tanem-tanemi sensaker küma aotsü.

A.Shin-23:20. "Yi pur rongnung aser shi chidiyungdi rongnung teli. Kechiyong yi pur aser chidiyungdirji sensak tiai ayitsü". Iba laishiba tapu aser tekong nung ya-a yi pur aser chidiyungdirji sensak tiai ayitsü, anungji yi pur aser chidiyungdir rongnung teli...Tetezü yi tejem ta tekümdangtsü ashiba angur.

A.Shin-31:4. "Yi ajemtsü chubatem asoshi masü, aji chubatem asoshi masü. Mesura yimsusurtemi temesepba yi mebushitsüla. Ashiko parnoki ajemtsü aser ozüngji amatsü". Iba laishiba nung chubatem aser yimsusurtemi yi majemtsüla ta shia angur. Kechiyong parnoki yi jemra yimden-yimli ozüngji amaa-adoktsü aser aibelena obendang agütsütsü. Tesasatsüka, tanü asen lima nung Politician-tem aser yimtsüng nung putu yimsusurtem teimba ka yi-jemertemi yimsu asüba agi asen sorkar aser asen lima ya majunger.

A.Shin-31:6-7. "Samatsü renema alir nem temesepba yi agüjang. Aser taküm nung kürema alir nem yi agüjang. Parnok yi jemdakjang aser sensak tia amadakjang. Aser timtem tali tebilemtetdaksü". Iba laishiba nung ashibaji...Yi ya tesamatsüpur nem jemdakjang ta shia angur...Tetezü tasütsüpurtem nem yi-ji jemdakjang ta ashir. Sensak tia amatsüba aser temulong kürema jashiba amatsüba atema jemdakjang ta ashir...Tetezü kibong takar küma alitsüba aser taküm arishi talang lia, temang shi anema junga alitsüba atema jemdakjang ta ashir masü, saka tamajung ka atema jemdakjang ta ashir...Tetezü yi-ji mim mozü amai amshitsüba indang ashir ta angatetdi.

Tanü putu nung lanurtemi laishiba nung yi tejem ta shia malia...Aser yi terarabo jemang ta dang shia lir...ta asaya-menua bangpetsü amai jembiba aiben angazüker. Paul-i Timoti dangi züluba shiti nung... "Ne tepok atema aser aiben ne tashidak asoshi joko tzü tesa mejemi yi terara jemang" (1 Timoti-5:23)...ta ashiba angur. Iba lai tapu aser tekong nung shia alibaji tajemetdak küli sur, aturar, kijung lanur aser aiur-asangur aikati yi ajemtsübaji laishibai mela-a lir ta salep-saria asaya-menur. Paul-i Timoti dang yi terara jemang ta züluba...Iba yi-ji teraratsü aser temeseptsü (Alcohol) adenba yi masü, saka par putu nung kanga bulua amshiba, sungjanglijang tzü agi yangluba yi (Juice/wine) asütsü sudi. Aser ajia tashitak atema terara jemang ta dang ashiba angur... Saka mesepa jemang ta shia mali. Anungji Tsüngrem o agi asaya-menu masütsüla. Aser iba yi-ji tanü putu nung ajemba Rum, Whisky, Brandy, Beer, etc. koba nung teraratsü aser temeseptsü (Alcohol) dena lir, iba yi denji meyoktepa mangatettsüla.

Yi ya Naga nungger tamanger ajaki azüngashia atakadema, joko tang nungi shibai iba yi nung kongshidir, iba yi jemdir aser iba yi yokdir atakadem suang...ta Tsüngrem tsüngdang azüngashir endokogo. Tamanger ajungai Naga lima nung khenyongi yi meyanglutsü, mayoktsü aser majemtsü (Try State)...ta alima dang sangdongogo. Tsüngrem oi ashir... "Atemzüker meinyak dang nungibo nai matemzük tajungba" (Sayu-5:5). Tsüngrem dang azüngashia ademzükba ya pongpa-pongpa-a mebilermsüla. Ademzükba ya nubur mesuzüktsüba hadir ka amai mamshitsüla. Ademzükba ya jilo benshiba aser konang-nungsang ka amai mebilermsüla. Kechiyong Tsüngrem dang azüngashia ademzükba shitak meinyakra atakadem angutsü. Akhidang yi ajemer dang nungi tanü putu nung yi ajemer arishi tatsüba alir, kechiyong yi ya tamanger ajaki metsü-metsülokja atakademba oset ka kumogo. Anungji shirnoki tekong meranga yi ajemer mela-mela arishi leptoktsü aser shirnoki atapisua yi ayoker temerenshi ngulanglang.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

FCRA licence magütsüba ajanga Khristan ministries timtemer



2020 küm Church of North India (CNI) küm 50 ajungba Jubilee sentong nung tangokba noksa nung angur.

April 09, 2024: India linük nung Foreign Contribution (Regulation) Act (FCRA) license 'renew' mesütsüba agi Khristan ministry aika timtemdar; March ita nunga Khristan melungtet telok Vision India indang FCRA license renew mesütsü.

Yaküm India nung Evangelical Fellowship of India (EFI) aser Church of North India indang FCRA license-a agienja liasü. EFI ya India nung evangelicals tentet ka lir.

Vision India-i Khristan lanurtem nem leadership training agütsür. Vision India Director, Vijay Mohod-i, "Hopta ka tejaklen sorkari onok office mita aru aser hopta ka shi lir Vision India indang FCRA license renew sütsütsü memelung," ta metetdaksü.

Taoba mapang Ato kilonser, Indira Gandhi-i 1976 küm Emergency mapang nung FCRA benoka liasü. Bendang linüktemi India telung inyakyim nung jangjonger, ta shia ibaji nokdangtsü nukjidong nung FCRA ya benoka liasü.

Mezüngbuba FCRA kübok bendang linüktem dang nungi senotsü teyari agizütsü atema organization balalai Ministry of Home Affairs den register asütsüsa aküm. Iba sülen 2010 aser 2011 küm FCRA ozüng tesashiba aküm.

Joko India nung küm pongu shia organization temi FCRA license renew asütsüsa akümer. 2020 aser 2022 küm nunga iba ozüng tesashiba yanglua liasü. Arlla ka nungbo FCRA organizations ajakji bank ka nung dang parnok account lapoktsü tuyua lir.

Organization balala küm pongu inyaka aruba indang report agütsüba nung ajemdaker ang Ministry of Home Affairs-i license renew sütsür. Report nungji organization temi bendanglen nungi anguba senotsüji kechi nung indokar tejangja ashitsüsa akümer.

Ajisüaka Khristan organizations aser ministries indang license aika renew mesütsür, aser ibaji ajanga India

nung mission mapa inyakba tsütsülen tetsükdaksü ajurur.

Khristan lenir karibo, Khristan ministries indang license renew sütsütsü memelungba ya kechi tai ajanga; iba ya sorkari nukjidong kar yur inyaker asü? ta tasüngdangba akar. Catholic Bishops' Conference of India (CBCI) nung general secretary, Anil Joseph Thomas Couto-i, "Organization aikati bendanglen nungi yokba teyari nung metaloker. Parnoki senotsü teyari mengura project aika anenadoktsüsa akümer," ta metetdaksü.

2017 küm nunga India sorkari Khristan melungtet telok Compassion International indang FCRA license agienja liasü. Iba mapang nungji Compassion International-i küm shia bendanglen nungi dollar sen million 45 shi ngua liasü.

2017 küm report ka ajanga, "Compassion International-i iba linük (India) nung maneni inyaker. Parnoki India nung lawyers aser accountants dena jembiogo. Parnoki US House of Representatives' Foreign Affairs Committee matsüngdanga iba tebilemsü benokogo aser taoba mapang Secretary of State, John Kerry danga iba osangji India ketdangsertem nem-a metetdakang ta mepishio. Parnoki tenla agütsürtem (sponsors) danga peipei Congress züngsertem dang ibaji lemsatepang ta shiogo. Nisung 35,000 dak temai yamaji inyaker. Parnoki US aser India naprongla nung tongti ketdangsertem den ibaji lemsatepogo," ta metetdaksü.

2014 küm Narendra Modi Ato kilonser akümba mapang nungi Khristantem reshikangshi kanga bulua kümogo. Khristan ministries indang license renew mesütsüba bendanglen nungi anguba senotsü tim mesüi amshiba agi lir, ta Home Ministry-ibo ashir.

Yaküm India nung Evangelical Fellowship of India (EFI) aser Church of North India indang FCRA license-a

agenja liasü. EFI ya India nung evangelicals tentet ka lir.

EFI General Secretary, Vijayesh Lal-i, "EFI-i temeim mapa inyaker aser loktiliba nung apu latsütsü atema sarasadem sentongtem agir, lokti balala tsüngda tesünep nung alitsü atema inyaker, ajisüaka sorkari onok yamai sendokba agi onok süngmanger," ta ashi.

"Ashiko, onoki Khristantem nem yimsü temeden agütsütsüla ta jembiba agi onok anema inyaker asütsüsa akok, ta kü dang shiogo. Khristantem anema inyakba tatalokbatem anema onoki Supreme Court nem-a temepishiba ken o agütsüogo aser anti-conversion ozüngtem anema high court aika nung ken o benokogo," ta paisa metetdaksü.

2022 küm India sorkari World Vision indang FCRA license khenpiga anenja liasü, iba sülen taküm January ita nung World Vision license agientsüogo.

India nung iba ministry nung nisung 6,000 dak tema lir aser iba ministry-i linük toktsür mao saka FCRA license agientsüba agi senotsü lenmang shibanga project aika anenadokogo.

World Vision-i, India sorkari FCRA license agientsüba ajanga linük tesem ajaklen sensakertem taruba küm aika timtemtsü, ta metetdaksü.

Yaküm CBCI indang license bo renew sütsüogo saka sorkari National Biblical Catechetical & Liturgical Centre (NBCLC) nembo license magütsür. Iba dak alia India nung CBCI kübok Catholic Arogotem aika indang FCRA license anenja lir.

India nung Church Auxiliary for Social Action (CASA) indang license-a agientsüogo.

Ministry of Home Affairs indang FCRA website nung shia aliba agi, 2024 küm April ita tashi nung India nung melungtet telok aser associations 16,000 ket nung FCRA license lir.

Home Ministry-i melungtet telok mesüra associations 20,700 indang FCRA registrations agienadokogo.

ANOGO ABEN TSÜNGREM DEN

Nenek alima tesangwa

Mathi 5:13

Tsüngremer nüburji alima asoshi teraksa aser temenen samaja aliba lima ka wazüka ayur tongti lir. Ne takümü kechi tajung aser temeten lir aji wazüka ayutsü asoshi Tsüngremi yanglu aser telok nung yutsü. Tanü temeshi nisung ka lokti nung densembaji kanga tongtipang lir. Khrista ne dak aliba tangar asoshi Pa akaba ajak kaa kümdaktsür. Pa tekümtet jagi mozü lar nüji kümdaktsütsü akok, kibong teraksa medenteptsür, tesüiba zübu anebtsür, leman tai nung nemzüa alir anir arur aser jashia alir mulungjang süneptsür. Na ajanga Khrista sayudang na meketa alirtem nem item ajak agütsür.

Kibuba den asenok tesendaktep raksadokra, Yisui ashir, asenok metsü dak tanang samadokba ama alitsü aser tagidak maka akümtsü. Tsüngremer tekümüzkba taochi kecha tangar nem asenok ajanga agütsütsü makok. Asenok dak metsü aliba asenoki koda tendangtsü? Ner kibong repringang. Asenoki aji tamajungba nungi wazüka yua lir ma? Asenok mapa inyakdak tendangang. Asenoki idakji aliba agi temenen mapa meinyaki lir ma?

Asenok lokti repringang. Asenok idakji aliba agi aji tajungba meta kümdar ma? Arogo koda? Asenok Tsüngremi amshiba ajanga aji tajungba kümdar ma? Asenok meketa aliba nübur tanela tashi meiti kümra, asenoki Tsüngrem dangi oa parnok wazüka ayutsü atema asen taküm yanglushijang ta Tsüngrem dang asüngdangtsüla.

UK nung Khristan aika tanela asentenshi tenzükogo: Justin Brierley

April 09, 2024: United Kingdom nung kaketzülur aser Brierley-isa, "Joe Rogan aser Douglas Murray nungeri podcaster nüngtugu, Justin Khristan tamang indang kanga Brierley-i, tang UK nung bulua jembir. Tetsürtem Khristantem aika tanela temeden atema inyaker Louise asentenshi tenzükogo, ta Perry-i 'The Case Against The Sexual Revolution' kaket metetdaksü.

"The Surprising Rebirth of Belief In God' kaket zülusang, Justin Brierley-i pa oji pusema alima tesem balala nung tatalokbatem otsü tatsü aika lemsatep.

Brierley-i, "Kaketzülur aser sangro mejemer Paul Peterson Kingsnorth-i 2021 küm pai November ita nung O2 Arena Khrista agizükba sangdongba nung pai onük jembiba sentong ajanga nisung aika aoksa. Tang ka nung ni-a densema liasü. Russell Brand-i pa Khristan ka, Pai lanurtem dang Laishiba ta ashir aser pai baptitsü dangi meyiptsüla, kechiyong ibi kaket nung meimchirtem indang shisatsü tarok lir ta jembia liasü," ta Brierley-isa metetdaksü.

Brierley-i, "Secular pioneer, Jordan Hall-i tawa pai shisashirtem aika melungjang nung Tsüngremi mapa inyakba temaitsütem ni nguogo. Parnok aikati secular tangatetba ajanga tamakok angur ta meteta Tsüngrem dak tamang akatsü aser Pa dak azüitsüsa jenjang ocer ajanga tenaprong taküm nung kongshiba lemsatepogo," ta metetdaksü.

"Ano Khristan yimsü ajungba indang jembirtem rongnung psychologist Jordan Peterson densemogo. nungeri Kakerly-isa, "Joe Rogan aser Douglas Murray nungeri podcaster nüngtugu, Justin Khristan tamang indang kanga Brierley-i, tang UK nung bulua jembir. Tetsürtem Khristantem aika tanela temeden atema inyaker Louise asentenshi tenzükogo, ta Perry-i 'The Case Against The Sexual Revolution' kaket metetdaksü.

Brierley-i, "Secular pioneer, Jordan Hall-i tawa pai shisashirtem aika melungjang nung Tsüngremi mapa inyakba temaitsütem ni nguogo. Parnok aikati secular tangatetba ajanga tamakok angur ta meteta Tsüngrem dak tamang akatsü aser Pa dak azüitsüsa jenjang ka nung lir," ta metetdaksü.

AO OSHI ANGAZÜKDAK: TANÜ ANGAZÜKTSÜBA OJANG



Süli

(v) ka asüyonga, ka asüyonga, mashi ka (anyone)

* Na süli, ni süli, ana rongnung mashi ka aotsü.

Süli

(adv) tang asü, sür talangka masü (just died)

* Nisung süli kinungertemi mang zütsür.

OLONG PAITEP # 6752

Grid for crossword puzzle #6752 with numbers 1-19.

TIPIEN

- 2. Teburtemi tejak nung awaba - (8)
6. T ___ em - (3)
8. Tzüik ayudak - (3)
9. Nüngdakba dang timba - (6)
11. Züina ao - (4)
12. Yangi tzü angur - (5)
14. Tangar dang nungi tali - (4)
16. Senyong masü - (6)
17. Oadokdi - (3)
18. Tzü tarok - (3)
19. Yimtaklir aikati iba ya ki den külemi yanglusemer - (8)

LANGTSÜNGLEN

- 1. Temejangdak - (6)
3. Nisung ka mapa inyaksü nübo - (4)
4. Azüntsü asoshi mejemba - (6)
5. Tesangwa agütsüba - (5)
7. Tila masü - (4)
10. Tebenjem tetsür chanu - (4)
11. Tekolak nung inok - (4)
12. Tetsüngda - (6)
13. Tangar inyakba ka inyak - (6)
14. Tim masü ta ashi - (5)
15. Asalendong - (4)
16. Tanü dangtsü - (4)

OLONG PAITEP # 6751 TELANGZÜBA

TIPIEN :

- 1. Telok, 4. Aluru, 6. Ozüing, 8. Emk, 9. Kin, 10. Teti, 12. Süir, 13. Jen, 14. Ola, 16. Talak, 17. Mazük.

LANGTSÜNGLEN :

- 1. Tenükjang, 2. Luden, 3. Kioksü, 5. Lenti, 7. Tajangzük, 11. Teronem, 12. Sempa, 13. Jahaz.

NAI-A YA METETTER MA

NISUNG TEIMTIBAI ANÜ AMA SUBOBA OTSÜ



Guinness World Record adjudicator Mike Marcotte-i Niagara Falls, Ontario, Canada nung nisung 309-i anü ama subor adenshiba indang kulikaket agütsüba angur. April 8, 2024 nü total solar eclipse alidang Niagara Falls, Ontario nung nisungtemi iba otsü tasen yanglutetogo. US, Canada aser Mexico nungi total solar eclipse kanga junga ngua liasü.

Meitei New Year 2024 mongogo

Imphal, April 9, 2024 (Agencies): Manipur nung Meitei nungeri Sajibu Cheiraoba ta ajaba "Manipuri New Year" mongogo. Kümshia parnoki Sajibu ita (April) nung iba benjung amonger.

Manipuri New Year 2024 ya Mongulbarnü Meitei nunger ki ajunga nung mongogo. Iba benjung nung nisungtemi süoshi tasen asemer aser ki merükmejur. Iba benjungmong ya King Maliya Phambalcha (1359 BC-1329 BC) yimsüsüba mapang nungi amongtsü tenzüka liasü. Manipur Governor Anusuiya Ukey aser Chief Minister N Biren Singh nati nübertem den Cheiraoba salem lemsatepogo.

PELABA LEMSATEPER

Onoki teti meima aliba tsürabur asür Mrs. SHILUMONGLA (Changtongya Town) la shirangba yipten nung aliba mapang nungi la akümlitoktsür aoba anogo tashi nung ozü molung zürep jashi nung alidang kija aser kibongtem kwikati ozü tejashi khuret mapang rongsen, nübo aser sarasadem agi nungita yariogo nenok ajak dang kangasa pelaba lemsateper.



-Temeim chirnurtem, kinunger aser semchirtem.

Tasoba 15-12-1945 Tasüba 25-03-2024

Nenek mapa tajung asoshi Tulusang Tsüngemi talubosa moajangma ta ozü sarasadem.

ULFA-I tanishir Paresh Baruah tedi Bimal AGP nung aden

Dibrugarh, April 9, 2024 (Agencies): ULFA-I tanishir Paresh Baruah tedi tambusang Bimal Baruah-i Asom Gana Parishad (AGP) nung denogo. AGP ya Bharatiya Janata Party (BJP) den yaritepba telok ka lir. Bimal Baruah ya Matak Autonomous Council nung councillor ama inyaker aser

Mongulbarnü Chabua nung pai BJP nung aden. Iba sentong nung AGP president aser Assam minister Atul Bora aden aser Chabua nung AGP election office lapok. "Matak Autonomous Council züngsem aikati BJP nung adenba sülen ni taoba hopta ka shi BJP nung adentsü bilema aru" ta

Bimal Baruah-i ashi. "Ozü local MLA-ia AGP nung adentsü ajungmeso. Ni state tayongzükbatem nung ajemdaker tesüiba mapang BJP nung dennür lila saka ni AGP ang shimtet" ta pai ashi. Bimal Baruah ya retired defence personnel ka lir aser ULFA-I tanishir Paresh Baruah tedi tambusang lir.

SC-i independent MLA Karikho Kri shimba pusemer

Itanagar, April 9, 2024 (Agencies): Arunachal Pradesh nung 2019 küm Tezu assembly constituency nungi Independent MLA Karikho Kri takok anguba Supreme Court-i metentsüogo. Justice Anirudhha Bose aser Justice Sanjay Kumar na adenba bench kati July 17, 2023 nü Gauhati High Court indang Itanagar bench-i obendang agütsüba agientsüogo. Gauhati high court-i Karikho Kri takok anguba magizük. Iba anema Kri-i Supreme Court nung ken o benok. Election nung toktepba

candidate temi parnoki meyong moveable property ajunga affidavits nung ashitsü nüngdak madoker ta SC-i ashi. Taoba Congress candidate Nuney Tayang-i 2019 assembly election result sangoktsütsü atema petition ka agütsüba sülen high court-i iba oshidang agüja liasü. Kri-i Representation of the People Act, 1951 nung Section 33 nung aliba ama pa indang nomination paper magütsü ta Gauhati high court-i ashi. Kri-i election nomination paper nung pai sorkar kidang

(MLA Cottage No 1, 'E' Sector, Itanagar) aliba osang magütsü ta Tayang-i tai tonglokja Tezu assembly constituency election sangdong agientsü ken o benok. Kri-i rent, electricity charges, water charges aser telephone charges atema bangdak department dang nungi "No Dues Certificates" memeshi ta Tayang-isa aitsü. Iba assembly constituency atema election ji April 11, 2019 nü agi aser May 27 nü results sangdongba nung Kri-i Independent candidate ka ama takok anguba metetdakja liasü.

Assam-Meghalaya arrtsü 80% tashi angatettepogo

Shillong, April 9, 2024 (Agencies): Assam-Meghalaya arrtsü ken o 80% shi angatettepogo ta Meghalaya cabinet minister aser Bharatiya Janata Party (BJP) lennir AL Hek-i ashi. Assam-Meghalaya arrtsü nung 20% mangatettep alibaji timi angatetteptsü merangdar ta Hek-

i ashi. Iba ken o adoker küm 50 tema süia arur aser tesem 12 nung ashishiteper. Assam aser Meghalaya tsüngda kilometre 885 agi arrtsütepa lira ser iba nung Upper Tarabari, Gazang Reserve Forest o Hahim nung ali rakteper.

Assam-Meghalaya inter-state arrtsülen ashishitep aketba tesem 6 atema agreement ka nung sign sütepogo. 1972 küm Assam nungi Meghalaya state balaka razüka aoba mapang nungi arrtsü ken o adok aser iba dak sendakba nung nisung 12 tashi süogo.



Imphal nung Battle of Kanglatongbi ataloker küm 80 ajungba bilemteta sentong ka agidang tangokba noksa ka angur. Iba rara dang Lion Box of Kanglatongbi ta ajar aser April 6/7, 1944 aonung British aser Indian armies nungi 105-i kanga dang tasü itta post kümzüka ayu. May 3, 2024 nungi Manipur nung tensa mejungi akümba ajanga April 7, 2024 nü National Memorial Arboretum (NMA) United Kingdom nung Burma Star Memorial nung iba sentong agia liasü. Iba sentongji Reverend Dr. Andrew Sangster-i ketdangsüa agi aser taoba British Military Adviser to India Brigadier Clive Elderton CBE-i yokba osang Col. Terry-i zünga metetdaksü.

Rafah amaktsü anogo lateta lir: Benjamin Netanyahu



Benjamin Netanyahu

Tel Aviv, Rongchii/April 09 (Agencies): Cairo nung Hamas den rara anena atatsü asoshi jembishinü tesüdak lia Gaza south tsütsü Rafah amaktsü anogo lateta lir ta Israel Ato Kilonser Benjamin Netanyahu-i ashi.

Hebrew oshi nung pai video ajanga sangdong ka agütsüba nung, rara nung takok angutsü asoshi Egypt den arütsüa aliba Rafah nung ground military operation agitsü tenügdaktsü ta Netanyahu-i nenshia ashi. Rafah nungya Palestine nung million 1.5 dak tema jenoka lir. "Ibaji ataloktsü. Anogo ka lateta lir," ta pai Hombarnü kanga merasai ashi.

Hopta tatemlen ceasefire asoshi jembishinüba nung Hamas nem proposal tasen ka agütsüba sülen iba sangdong ya arur, ajisüaka Hamas-i iba proposal ya magizük amai ajiteter.

Palestine nung telok yagi iba proposal ya asadanger ta sangdong ka nung shiogo saka ozü nüburtemi akhangba atema Israel nungi telangzüba kecha mali, ta ashi.

Netanyahu-i jembiba ajanga yimjung ken o tanaben jembitsü atema tebilemdangtsü ka arur, ta Hamas odongtar Sami Abu Zahry-i osangbener dang ashi.

"Tashiyim amshiba anenba ajanga dang yimjung ken o jembiba nung takok alitsü. Onoki akhangbaji tejangja, ozü nübur anema tashiyim amshiba anendang," ta Zahry-i ashi.

Gaza nung aliba Palestine nung meyirijang aika tenokdangba melie meyiba shilangdaktsü akhangba aser iba tesem nungi Israel

mitkartem ainshitsü Palestine nungeri akhangba tang tashi Israel-i magizüki arur.

Israel mitkari Gaza nungi ground forces kar anizüker aor ta shiogo, saka east-west corridor anepalutsü asoshi sepaitem yua lir, koba ajanga Gaza ya sadangtsür aser north tsütsü Palestine nung meyipa aoba nokdang.

Israel-i Rafah amaktsü sentong United States-i maneni yimjak nunga anema nokdaka arur, kechiaser iba yimti nung civilian aika aliba anizüker aotsü sentong tejangja kecha mali ta ashir.

Rafah nungi Palestine nung anizüker aotsü atema terenemshiba ka ama Israel-i süki 40,000 alir ta Israel ketdangtsür kati osangbener dang ashi.

Netanyahu-i iba osang sangdongba sülen US Department of State indang odongtar Matthew Miller-i osangbener dang ashiba agi, Rafah asoshi mera tasen agitsü indang US nem osang tejangja kecha agüja mali.

"Mitkar tashi ajak amshia Rafah amakba ajanga civilian nem timtem agütsütsü aser tatem nung Israel indang security akoksatsü ta onoki indang-indanga Israel dang shiogo," ta Miller-i ashi.

March ita tatemlen United Nations Security Council ajanga ceasefire asoshi khanga pangzüng ka renemba ama Egypt, Jordan aser France lenirtem lungjemer The Washington Post aser Le Monde densema media outlets balala nung züluba mapang ka nung iba osang ya angashir.

"Israel-i Rafah amakba ajanga lendong timtem tulu adoktsü, kong Palestine nung civilian million 1.5 dak tena jenoka lir. Iba ama tashiyim amshiba ajanga tasüba ang timba aser timtem ang timba alitsü aser Gaza nung aliba nübur ajunga tashiyim agi tesem balala nung prokshidaktsütsü aser region nung tensa mejungi akumtsü," ta lenirtemi ashir.

Kasa mapang Israeli Defence Minister Yoav Gallant-i Hamas teloki pua alirtem asoshi jembishinütsü mapangji tangya shidak lir, ta ashi.

Hamas lenir kati osangbener dang ashiba agi, Israel-i benoka aliba proposals nung onoki akangba abensaja mali saka onoki asadangtsü.

"Israel nung jenjang nung temelenshi mali, anungji Cairo jembishinü nung tasen kecha mali. Yangji terenlok kecha mali," ta Hamas ketdangtsüri ashi.

Cairo senden nung CIA director William Burns dena lir. Pa adenba ajanga Israel tembar US-i agreement asoshi tali ajungshir ama sayur.

Egypt Tir Abdel Fattah al-Sisi, France Tir Emmanuel Macron aser Jordan King Abdullah II nungertem lungjemer dingdong ka agütsüba nung Israel sorkar dang Rafah-i sepai yoktsü aliba jung-junga bilemdangtsü shia liasü.

"Gaza nung rara aser ibaji ajanga meimchir nem timtem agütsüba tangsa anentsüla aser Gaza asoshi teyari tali agütsütsüla," ta par asemi France indang Le Monde osangkeket dangi zülü.

Maneni Hombarnü Gaza telungi aid trucks 419 aitogo, ta Israel-i ashir.

October 7 nü Hamas teloki Israel south tsütsü arütsü alema aita amakdang nisung 1,200 tepset aser 250 dak tema pua bener ao.

Gaza nung tang tashi nisung 130 pua lir aser 34 süogo ta Israel-i ashir.

Israel-i Gaza amakdang nisung 33,000 dak tema tepsetogo aser item rongnung timba civilian lir, ta Hamas meyong health ministry ajanga ashir.



Ural River nung tzu tali ayimba ajanga tzumetsung adoka Orenburg region nung tanur 885 densema nisung 4,000 dak tema pei ki yutsur tesem balalai anir aotsüsa akum. Kazakhstan den arütsü anasa Orenburg region nung tzu nokdang laoa tzumetsung adokba atema teyari meshia Russia kübok Orsk yimti nung nüburtemi longkak aita liasü.

MULUNGNEN O



Asür. PANGITSULA JAMITSUR

Aso : April 1929 | Asü : March 17, 2024

Onoki teti meima aliba ojala Pangitsula Jamitsur shirangba mapang nungi March 17, 2024, la tasünü tashi ozü den sarasadem, nübu, rongsen aser shisatsü agi yaritepba atema Eden Hospital Dimapur indang Doctors aser Nurses tem, Dimapur Ao Baptist Arogo, NST colony nung kidangertem, Süngratsü Baptist Arogo, yimtsür-yimer, kinunger, tembar aser temulungertem dang ozü temulung taroktiba nungi pelaba lemsateper.

Onoki kija shia dang pelaba melemsateptetaka, nenok mapa tajung ozü mulungjang nung teti alitsü aser Tulusang Tsüngremi nenok ajak mulamushia moajang ta sarasademtsür.

Temeim Jabaso, Kinungtsü, Semchir, Anükapang aser Kinungertem.

Myanmar nungi jena arur 100,000 agizüktsü renema lir: Thailand



Parnpree Bahiddha-Nukara

Bangkok, Rongchii/April 09 (Agencies): Myanmar nungi jena aruba nisung 100,000 agizüktsü Thailand renema lir, ta Thailand foreign minister-i Mongulbarnü ashi.

Thailand ya Myanmar den arütsü 2,400-kilometre (1,490-mile) talang lir aser Myanmar nung 2021 küm democracy yimya nung shimba sorkar mitkari tashiyim amshia atsingdokba sülen civil war ka nung lir.

Tawa Myanmar army temi timtem tamajungtiba ajurua lir, kechiaser mitkar anema rarar temi taoba mapang sunepa aliba tesemtem amokbanga lir.

"Onoki mapang tatsüka renema arur aser Thailand indang safe area nung khen atema nisung 100,000 anioktettsü," ta Foreign Minister Parnpree Bahiddha-Nukara-i ashi.

Thailand ya UN Refugee Convention nung meyongnem agütsüba linük ka masü aser parnoki refugee aser danga migrant tem mebendanger.

Thailand jila, Mae Sot nungi arütsü alema orr Myawaddy jila anasa hopta tatemlen kanga sashia khatpeba osang lir.

Thailand-Myanmar arütsülen raraba tali akumba ajanga nisung aika khen atema Thailand nung jenok aser meyipa ao.

"Mass evacuation" meliaka nüburtem arütsü alema arur, ta pai osangbener dang ashi.

Ajisüaka Parnpree-i Thailand-Myanmar arütsü lapoka ayutsü nungdak ta ashi aser Mae Sot ajanga Myawaddy telungi shishilempaba oset bener aiter, ta ashi.

"Rara mali, shishilempaba lir, saka ajemer. Taoba küm shishilempaba shilem 30 agi ajemogo," ta pai ashi.

Myawaddy ya Myanmar asoshi arütsü alema alilen nungi senzüba mazüngtiba tesem tasembuba lir aser tesüiba ita 12 tsüngta sen billion \$1.1 jenjang osettsüset iba tesem ajanga bener ait, ta Myanmar indang commerce ministry ajanga ashi.

Mongulbarnü Ato Kilonser Srettha Thavisin aser Thai ketdangtsürtem adenshia arütsü indang ken o jembia liasü.

"Arütsü nung tensa tamajungba akumnungbo ta ato kilonseri khuret abener," ta Parnpree-i ashi.

Nüburtem anir aotsü atema special flights asem anendaktsütsü mitkar temi mepishiba ama melaogo, ta Thai sorkari Hombarnü shia liasü.

Ajisüaka 1980s nungi Myanmar yutsür jena arur nisung meyirijang aika arütsü anasa 'informal settlements' nung alitsü mela arur.

Amokmerenba sülen Champions League atema security yoksemer

Madrid, Rongchii/April 09 (Agencies): Islamic State telok bhukumba media outlet kati tan hopta UEFA Champions League asayatsü aliba tesem anema amokmeren osang sangdongba sülen security timba kumtsüsü.

IS bhukumba media channel kati posters aika adoktsüba nung Mongulbar aser Bodhbarnü Champions League quarter-final asayatsü aliba stadium tem amaktsü ayongzüka liasü.

Amokmerenba indang onoki meteta lir saka Madrid, Paris aser London nung asayatsü sentong yanglua aliba ama asayatsü, ta UEFA ajanga ashi.

France aser Spain nung aliba ministry temi security mera tali agitsü indang shiogo.

Bodhbarnü PSG aser Barcelona tsüngta Paris nung asayaba mapang security timba agütsüsü, ta French Interior Minister Gérald Darmanin-i ashi.

"Anogo ter tejakdang IS-i Munich stadium indang noksa ka lemsatop aser football asaya ayongba tesem anema mera agitsü ta ashi. Champions League ya football asoshi kanga tongtipang lir, anungji ozü

partners tem den jembir," ta Darmanin-isa ashi.

Tan hopta Madrid nung quarter-finals ana asayatsü lir. Hombarnü iba tesem nung Real Madrid aser Manchester United asayatsü aser Bodhbarnü Atletico Madrid aser Borussia Dortmund asayatsü.

Spain indang sports minister Pilar Alergia-ia Madrid nung asayatsü lia sangdong ka agütsüba nung, police aser civil guard officers 2,000 dak tema yoka lir, ta ashi.

"Tan hopta UEFA Champions League asayatsü aliba atema kiralongrar temi amokmerenba UEFA-i meteta lir aser asaya tesem shia ketdangsurtem den jembishinü sütagi," ta UEFA indang odongtar kati ashi.

"Nüngdakba security mera agia asayatem renema aliba ama asayatsü."

IS bhukumba channel ajanga London nung aliba Emirates Stadium, Madrid nung aliba Bernabeu aser Metropolitan Stadiums aser Paris nung aliba Parc de Princes Stadium amaktsü ayongzüka aser noksa lemsatopa liasü.

Mongulbarnü London nung

Arsenal aser Bayern Munich asayatsü. "Europe ajunga aser yangi London nung football asaya nung tenük yoker amaktsü online aser media ajanga ashiba onoki meteta lir," ta Metropolitan Police Deputy Assistant Commissioner Ade Adelekan-i ashi.

"Ajisüaka taonung asaya atema policing plan tashi ita lir aser tesunep nung asayatetsü asoshi club indang security team den maneni mapa inyaker."

Taoba hopta noksa ka lemsatopba nunga Munich nung aliba Allianz Arena indang noksa liasü, kong taruba hopta Bayern Munich ya Arsenal den return leg asayatsü lir.

Jihadist temi amokmerena noksa lemsatopba nungya noksa kar nung tejak zübanger prangbong bena aliba nguogo aser item noksa ya IS den yimjak nungbo sendaktepa mali saka IS bhukumba media groups temi prokshia liasü.

Ajisüaka iba amokmeren adoktsüsü totuyuba yabo IS nungi aru alitsü, kechiaser par lenirtemi official media operatives aser online supporters tsüngta amalitep akaba indang tawa shia liasü.

IPL nung Jadeja-i alizüng tasen tongtet



Chennai, Rongchii/April 09 (Agencies): Chennai Super Kings nungi all-rounder Ravindra Jadeja-i Indian Premier League (IPL) nung catches 100, runs 1,000 aser wicket 100 agitater asayar mezüngbuba kumogo. Pai iba alizüng ya Kolkata Knight Riders den asayaba mapang tongtet, kong parnoki wicket tenet agi akok.

Hombarnü aonung iba asaya nung pai 100 mark atongtsü asoshi catches ana agiteta liasü aser mezüng ball ti aonba nung wicket asem agia player of the match sempet angu. Pai IPL nung wicket 156 agia lir aser runs 2,776 nguteta lir.

IPL nung fielder temi catches

timba agitater Virat Kohli (110), Suresh Raina (109, Kieron Pollard (103) aser Rohit Sharma (100) nungertem den arishi küm 35 tain Jadeja züngoksemogo.

"Ni catch asübatem mazünger," ta pai asaya tiyong nung khen anisüngzükdang ashi.

Asaya atemba sülen pai Chennai nung bowling asütsü teti janngar ta shia liasü.

"Tesem tajung nung ball aontsü kü sentong liasü. Ni yangi aiben practise süogo aser nai tesem tajung nung ball ontetra, ibaji ajanga na yaritsüsa," ta pai ashi.

Chennai ya match pongu asayaba nung asemben takok ngur standings nung jenjang pezü buba nung lir.

Mumbai City-i asoshi ISL 2023-24 takok marok meta nung lir

Mumbai, Rongchii/April 09 (Agencies): Odisha FC aser FC Goa nati Indian Super League (ISL) 2023-24 League title akoktsü teimla aliba Hombarnü aonung Mumbai Football Arena nung Mumbai City FC-i 2-1 agi Odisha FC madak takok ngua telok ana teimla samatsüogo.

Mumbai City FC ya games 21 nungi points 47 bena lir aser iba season indang title kumzüka ayutsü meta nung lir aser parnok ket nungi iba takok marok ya tanabuba jenjang nung aliba Mohun Bagan Super Giant (MBSG) ajanga dang rakzüktetsü, shirnok asaya 20

nungi points 42 nguteta lir.

Odisha FC ya asaya 21 nungi points 39 nguteta lir aser temaba jenjang tanabuba nung tembangtsü merangtsü, aser April 13 nung parnoki NorthEast United FC den asayaba nung takok angunungbo semi-final asoshi maongka angutsü. Odisha FC aser NEUFC den asaya ya league games tatembangba alitsü.

Mumbai City FC ya league match tatembangba April 15 nü FC Goa den asayatsü. FC Goa ya points 39 bena lir aser Mumbai FC ajanga Odisha madak takok nanguba sülen parnok standings nung temaba jenjang tongtettsü teimla samaogo.

April 11 nü Bengaluru FC den asayadang Mohun Bagan Super Giant-i takok mongutetra Mumbai City FC ya ISL League Winners akumtsü tejanga.

Taoba season nung ISL Golden Ball ngua alisang Lallianzuala Chhangte kanga junga asayateta Mumbai FC asoshi mezüng goal agüja liasü.

Ajisüaka minute asem dang lir Mumbai City FC goalkeeper Phurba Lachenpa-i aibelenba yong Odisha FC nungi Brazil nung Diego Mauricio-i goal ka yoktet.

Iba sülen minute 61 buba nung Chhangte-isa goal ka agütsüteta liasü.


Saudi Super Cup nungi Ronaldo'er Al Nassr tsükogo

Abu Dhabi, Rongchii/April 09 (Agencies): Abu Dhabi nung Saudi Super Cup semi-final asayaba mapang Al Nassr captain Cristiano Ronaldo asaya tom nung yok aser par den tokteper Al Hilal teloki 2-1 agi akok.

Portugal asoshi otsüsü goal agütsüsang Ronaldo-i Hombarnü aonung Al Hilal nungi asayar ka dak takettsü agi atsükba sülen red card ka indang-indanga agütsü aser iba mapang 2-0 liasü aser par teloki asaya tatemlen goal ka agütsüteta liasü.

Jorge Jesus'er Al Hilal nungi Salem al-Dawsari-i minute 62 buba nung goal mezüngbuba agüja liasü.

Iba sülen minute 72 buba



nung Bazil nung Michael-i long cross ka agütsüba nung külem linük nungi Malcolm-i tekolak agi goal tonglokja liasü.

Stoppage time nung taoba mapang Liverpool forward asaya alisang Sadio Mane-i Al Nassr asoshi goal ka agüja liasü.

Brehostibarnü final asayaba mapang Al Hilal telok yagi Saudi Super Cup title pezü buba arishia asayatsü, shirnoki Karim Benzema'er Al Ittihad den asayatsü. Hombarnü semi-final ka nung Al Ittihad yagi Al Wehda madak 2-1 agi koka liasü.

Ronaldo ya December 31, 2022 nung al Nassr dangi free transfer nung arua sen million \$213 agi küm ana ser tasadang asoshi tezüngzüktep agia professional football asayar asoshi itasen timtiba nguteta liasü.

2023 küm January ita nungi Al Nassr asoshi asayasang Portugal nungbai tang tashi Saudi Arabia nung trophy kata nguteta mali.

Bengaluru nung training agitsü atema Hockey India-i tetsür asayar 33 shimogo

Bengaluru, Rongchii/April 09 (Agencies): SAI Bangalore nung May 16 tashi maneni training agitsü atema Hombarnü Hockey India-i züngsem 33 aliba Indian women hockey team sangdongogo. April 1 nü züngsem 60 aliba assessment squad iba camp nung arua aden aser April 6-7 nung selection trails agiba sülen parnok 33 ya shimtet.

Tang shima aliba squad nungi team kumteta tarutsü nung coaching camp nung adentsü aser bendang lima nunga asaya jajatsü. Indian women hockey team ya küm tatemlen FIH Hockey Pro League 2023/24 nung Argentina, Belgium, Germany aser Great Britain den asayatsü atema Antwerp aser London-i aotsü.

Tang shimteta alirtem nungya goalkeepers asoshi Savita, Bichu Devi Kharibam, Bansari Solanki, aser Madhuri Kindo nungertem alitsü, defenders asoshi Nikki Pradhan, Udit, Ishika Chaudhary, Monika, Ropni Kumari, Mahima Chaudhary, Jyoti Chhattri, aser Preeti nungertem shim.

Midfielders atema shimteta aliba asayatemji Salima Tete, Marina Lalramnghaki, Vaishnavi Vitthal Phalke, Neha,

Jyoti, Edula Jyoti, Baljeet Kaur, Manisha Chauhan, Akshata Abaso Dhekale, Ajmina Kujur, Nisha aser forwards atema Mumtaz Khan, Lalremsiami, Sangita Kumari, Deepika, Sharmila Devi, Navneet Kaur, Deepika Soreng, Preeti Dubey, Vandana Katariya aser Rutuja Dadaso Pisal nungertem alitsü.

Tawa tembangba 14th Hockey India Senior Women National Championship nungi Hockey Mizoram tenüng nung asayala arishi küm 22 tain Marina Lalramnghaki aser Manipur Hockey tenüng nung asayala arishi küm 25 tain Manisha Chauhan nungera iba squad nung densema lir.

2017 Hockey World League Semi Final nung Indian Women's Hockey Team asoshi tatemsaba asayaba sülen assessment camp nung selectors aser coaches tem puatetba sülen Preeti Dubey-iba national setup nung densemogo.

FIH Hockey Women's Junior World Cup 2023 nung Junior Indian Women's Hockey Team nungi asayar goalkeeper Madhuri Kindo, defenders Ropni Kumari aser Preeti, midfielder Edula Jyoti, aser forwards Deepika Soreng aser Rutuja Dadaso Pisal nungera shimogo.

BILEMDANGANG

"Nai na mezüng azüokang, iba sülen nai alima azüoktettsü."